

大型活動：「點做至好？」

個案四

內容：目擊無良商販欺騙遊客

喺一間售賣運動用品的店舖內

阿樂： 雅詩，呢對限量版波鞋終於出咗喇！好靚呀！

雅詩： 話明限量版實靚嘅，但係好貴呢，成千幾蚊呀！

阿樂： 限量版㗎，聽講全球只有一萬對，貴啲都值啦！

遊客： （用普通話）老闆，請問你，這雙運動鞋的價錢是多少？

老闆： （用普通話）四千塊！

遊客： （用普通話）那麼貴！

老闆： （用普通話）價錢已經很便宜，很多顧客都來我這裡買！這雙是限量版的運動鞋，全球只有一千雙。本來我的店舖有十雙，現在只有兩雙。要是你喜歡，就快點兒買呀！

阿樂： 嘩！你睇吓個老闆幾奸，對波鞋明明賣千幾蚊，公價嚟嘅，佢刻意抬高價錢欺騙啲遊客。

雅詩： 仲有呀，呢對限量版波鞋全球有五千對，唔係一千對咁少！

阿樂： 不如我哋將個真相話俾遊客聽，等佢唔使俾人欺騙。

雅詩： 嘩！阿樂，千祈唔好呀，老闆實認得我哋！我哋以後唔可以再嚟買嘢啦！

阿樂： 怕乜㗎，最多以後唔幫趁呢間舖頭。如果我哋唔告發佢，就會有更多遊客俾佢欺騙，破壞晒香港購物天堂的美譽啦！

雅詩： 但係會唔會有危險呢？

阿樂： 咁... 不如去消費者委員會告佢呀！

雅詩： 都係唔好理咁多啦，多一事不如少一事，走啦！

問題： 如果你是阿樂，你會否告發該無良商販？

情景一：阿樂會告發該無良商販

阿樂： 唔得，我哋唔可以置身事外，唔好怕麻煩，一定要告發佢，如果個個商販都係咁，話唔定下次被騙嘅就係我哋喇！

雅詩： 你講得都好有道理，咁不如我哋同個遊客講，然後一齊去消委會投訴呢間店舖啦。

阿樂： 一於咁話！

情景二：阿樂不會告發該無良商販

阿樂： 你講得啱，多一事不如少一事，既然唔關我哋事，都係唔好理咁多喇，而且投訴完之後又要提供好多資料，好麻煩嘅！

雅詩： 係啦，走啦！

之後阿樂同雅詩去咗另一間店舖，買咗嗰對限量版波鞋。

阿樂： 真係開心喇，我終於買倒呢對限量版嘅波鞋。

雅詩： 我知，你仲儲咗好耐錢添！咦...你睇吓呢段新聞，呢度話最近有人投訴，懷疑有店舖賣冒牌貨，受害人係買咗同你一樣嗰對嘅限量版波鞋呀！

阿樂： 邊間店舖咁無良呀？

雅詩： 之唔係你去買嗰間囉！

阿樂： 吓...